

察妖孽禍亂所行有兵亂疫喪飢旱災火也但其君修德則不為咎而加福出入無常故名災惑也填星
 土之精其位中央主四季黃帝之子女主之象主德為五星之王一名地侯其於五常信也於人主脾填
 星順度則國寧民富五穀豐熟也若填星失度則歲多風殺無實太白星金之精其位西方主秋白帝之
 子大將之象以司凶兵凡有六名一曰天相二曰天政三曰大臣四曰大師五曰明星六曰天翼詩云東
 曰啓明西曰長庚其於五常義也於人主肺太白亂行不居其度兵數起不熟而惡太白出入順度則天
 下昌豐也西方金色白故曰太白也辰星水之精其位北方主冬黑帝之子也凡有六名一曰安調二曰
 細極三曰能星四曰鉤星五曰司農六曰勉星其於五常智也於人主腎凡辰星司災變殺伐左氏曰辰
 星四仲月二月五月八月十一月出則天下太平五穀豐熟也天之執正出入平時也此五星在天者主木火土金
 水之五行在地者主五方五岳居人者主五藏五根於五常主仁義禮智信於五事貌也視也言也聽也
 思也此五者不闕行之者終久保之者德顯故動於天地令感鬼神天文要抄云五星盈縮失度則其精
 降于地為人歲星降為貴臣災惑降為童兒歌謠嬉戲填星降為老人老婦女太白降為壯夫處於林麓
 辰星降為婦人凡諸星皆如此尚書靈耀云二十八宿天元氣萬物之精也故東方角亢氐房心尾箕七
 宿其形如龍曰左青龍南方井鬼柳星張翼軫七宿其形如鶉鳥曰前朱雀西方奎婁胃昂畢觜參七宿
 其形如虎曰右白虎北方斗牛女虛危室壁七宿其形如龜蛇曰後玄武二十八宿皆有龍虎鳥龜之形
 隨天左旋亦五星從北行南為順行從南行北為逆行為逆行又五星早出為盈晚出為縮又日月星辰
 謂之天文日月與星謂之三光日月五星謂之七曜衆星並光謂之辰各晨昏正寒暑生歲時成也六合
 之間無不照明皆知天下之損益定人倫之禍福耳

〔和漢三才圖會天文星音性〕

按星雖亞日月本是少陽精自有所司定位而古今無變換明晦增減

之理偶見其變異者其地之恠知也若將風雨則閃爍動皆地氣感冒然非星動也氣躍也故星搖之下
 當有濕露百里之外則不動不躍矣